

Transkription von Urkunde HST 1356a

Ort, Datierung: Stralsund, 1356-08-14

Signatur: Stadtarchiv Hansestadt Stralsund, StU 0371 [\[online\]](#)

Inhalt: Hinreke Wythman: Quittung

Ik Hinreke wythman Johan wythma(n)nes sone . eyn borgher to deme sunde . dū wýtlyk . allen de /
dessen bref horen vnde seen . dat ich vnde myne rechte ernamen myt beradene(m) mude . myne(n)
leuen / vedderen bertram wulflame(n) eyneme borghere to deme sunde vnde synen rechten ernamen .
hebbe ver koft / to eneme eweghen kope . redeken vnde reckeleken . teyn mark gheldes vnde
vyf vnde zestech honregheldes / in deme dorpe to bussyn in deme lande to ruyen . vor hundredmark .
vn(de) vor twyntechmark . sundescher / pen(n)i(n)gghe . de he my to danke bereth heft . desse gulde .
scolen entrychten . Radeke . slagghard . / Suleke . Clawes cloth . Gustan . Dubberth . Guddemer .
Clawes . vnde koneke . se vnde alle ere / ernamen . Edder nakomelingghe . de dat guth bezytten .
edder buwen . desse gulde scal bertra(m) . vnde / syne ernamen . vpboren alle iar to su(n)te mertens
daghe . also also licht an hove^vuen . an kothghelde . / an vrygeme lande . vnde myt alder rechtecheyth .
vn(de) alder to horingghe . also id lichtan syner schede / Also id her hinryk van parowe eyn ryddere .
vn(de) syn broder bezethen hebben . vn(de) myne elderen / vn(de)ich na aldus langghe bezethen hebbe .
an watere . an weyde . an heyde . an wysschen . an struke / an bruke . an holte . an more . an torue .
myt allemem anrechte . vn(de) myt aller vryheyt . Dat / late ich em ganstz vnde synen ernamen .
vn(de) verlateth an desser geghewardeghen schrift / vn(de) be holde my vn(de) mynen ernamen . dar
nycht ane . vortmer schal ich em vn(de) synen ernamen(n) / des gudes waren iar vn(de) dach . also id in
de(m) la(n)de eyn recht is . vor alle de vor recht komen wyllen / vor aller lege ansprake . se sy
gheystlich . edder werlich . desse dy(n)gh vaste to holdene . dar loue / ich vp entruwen . an desser
gegheuwardeghen schrift vn(de) hebbe se bezeghelt myt myneme ynghezeghele / desse bref is
ghegheuen vn(de) schreuen . to deme sunde . na godes borth . druttenhundert iar / an deme
zesse vnde vyf theghisten iare . an vnser vrowen auende . erer hemmelvarth . Tughe(n) / desser dingh
zynt . her gherwen stulowe . eyn rathman to deme sunde . henneke van zemelowe / borchard plotze .
Everd velehoue . borghere dar sulues : de ere ynghezeghele to eyner be/tuchnisse hyr vore ghe
hengghet hebben . vortmer bouen alle desse benomenden dingh wan he / des van my esschende is . so
schal ich em dat sulue vorebenomede ghuth . gantzeken vor den heren vor laten